

- 丁三、付囑弘傳
 - 戊一、舍那付囑
 - 己一、結示付囑
 - 己二、放光付囑
 - 戊二、釋迦弘傳
 - 己一、受法將辭
 - 己二、旋歸本界
 - 己三、遵敕利生
 - 庚一、且明一界佛
 - 庚二、例結餘佛界
- 丙二、釋迦宣菩薩戒
 - 丁一、敘說戒原繇
 - 戊一、覆敘垂迹傳法
 - 己一、長行
 - 庚一、正述迹佛弘法
 - 庚二、方明以戒攝生
 - 己二、偈頌
 - 庚一、舍那始授
 - 庚二、釋迦轉授
 - 庚三、勸信受奉持
 - 戊二、正明樹下勸發
 - 己一、經家敘事
 - 庚一、佛欲結戒
 - 庚二、放光表瑞
 - 庚三、大衆願聞
 - 己二、釋迦自說
 - 庚一、舉自誦勸人
 - 庚二、明放光因緣
 - 庚三、勸大衆習學

※說明：科文錄自蕩益大師《梵網經合註》。

丁三、付囑弘傳

戊一、舍那付囑

己一、結示付囑

爾時，盧舍那佛爲此大衆，略開百千恒河沙不可說法門中心地，如毛頭許。是過去一切佛已說，未來佛當說，現在佛今說；三世菩薩已學、當學、今學。我已百劫修行是心地，號吾爲盧舍那。汝諸佛，轉我所說與一切衆生，開心地道。

己二、放光付囑

時蓮華臺藏世界，赫赫天光獅子座上盧舍那佛放光，光告千華上佛：「持我心地法門品而去；復轉爲千百億釋迦及一切衆生，次第說我上心地法門品。汝等受持讀誦，一心而行。」

戊二、釋迦弘傳

己一、受法將辭

爾時，千華上佛千百億釋迦從蓮華藏世界赫赫獅子座起，各各辭退，舉身放不可思議光，光皆化無量佛，一時以無量青、黃、赤、白華供養盧舍那佛。受持上說心地法門品竟，各各從此蓮華藏世界而沒。

己二、旋歸本界

沒已，入體性虛空華光三昧，還本源世界，閻浮提菩提樹下，從體性虛空華光三昧出。

己三、遵敕利生

庚一、且明一界佛

出已，方坐金剛千光王座，及妙光堂，說十世界法門海。復從座起，至帝釋宮，說十住。復從座起，至炎天中，說十行。復從座起，至第四天中，說十迴向。復從座起，至化樂天，說十禪定。復從座起，至他化天，說十地。復至一禪中，說十金剛。復至二禪中，說十忍。復至三禪中，說十願。復至四禪中，摩醯首羅天王宮，說我本源蓮華藏世界，盧舍那佛所說心地法門品。

庚二、例結餘佛界

其餘千百億釋迦，亦復如是，無二無別。如〈賢劫品〉中說。

丙二、釋迦宣菩薩戒

丁一、敘說戒原繇

戊一、覆敘垂迹傳法

己一、長行

庚一、正述迹佛弘法

爾時，釋迦牟尼佛從初現蓮華藏世界，東方來入天王宮中，說《魔受化經》已，下生南閻浮提，迦夷羅國。母名摩耶，父字白淨，吾名悉達；七歲出家，三十成道，號吾為釋迦牟尼佛。於寂滅道場，坐金剛華光王座。乃至摩醯首羅天王宮，其中次第十住處所說。時佛觀諸大梵天王網羅幢，因為說無量世界猶如網孔。一一世界，各各不同，別異無量。佛教門，亦復如是。吾今來此世界八千返。為此娑婆世界，坐金剛華光王座，乃至摩醯首羅天王宮，為是中一切大眾，略開心地法門品竟。

庚二、方明以戒攝生

復從天王宮，下至閻浮提菩提樹下，為此地上一切眾生、凡夫痴闇之人，說我本盧舍那佛心地中，初發心中常所誦一戒，光明金剛寶戒。是一切佛本源、一切菩薩本源，佛性種子。一切眾生皆有佛性；一切意、識、色、心，是情、是心，皆入佛性戒中。當當常有因故，當當常住法身。如是十波羅提木叉出於世界，是法戒，是三世一切眾生頂戴受持。吾今當為此大眾，重說十無盡藏戒品，是一切眾生戒本源，自性清淨。

己二、偈頌

庚一、舍那始授

我今盧舍那	方坐蓮華臺	周匝千華上	復現千釋迦	一華百億國
一國一釋迦	各坐菩提樹	一時成佛道	如是千百億	盧舍那本身
千百億釋迦	各接微塵衆	俱來至我所	聽我誦佛戒	甘露門則開

庚二、釋迦轉授

是時千百億	還至本道場	各坐菩提樹	誦我本師戒	十重四十八
戒如明日月	亦如瓔珞珠	微塵菩薩衆	由是成正覺	是盧舍那誦
我亦如是誦	汝新學菩薩	頂戴受持戒	受持是戒已	轉授諸衆生

庚三、勸信受奉持

諦聽我正誦	佛法中戒藏	波羅提木叉	大眾心諦信	汝是當成佛
我是已成佛	常作如是信	戒品已具足	一切有心者	皆應攝佛戒
衆生受佛戒	即入諸佛位	位同大覺已	真是諸佛子	大眾皆恭敬
至心聽我誦				

戊二、正明樹下勸發

己一、經家敘事

庚一、佛欲結戒

爾時，釋迦牟尼佛初坐菩提樹下成無上覺。初結菩薩波羅提木叉，孝順父母、師僧、三寶，孝順至道之法。孝名為戒，亦名制止。

庚二、放光表瑞

佛即口放無量光明。

庚三、大衆願聞

是時，百萬億大衆：諸菩薩、十八梵天、六欲天子、十六大國王，合掌至心，聽佛誦一切佛大乘戒。

己二、釋迦自說

庚一、舉自誦勸人

佛告諸菩薩言：「我今半月半月自誦諸佛法戒。汝等一切發心菩薩亦誦；乃至十發趣、十長養、十金剛、十地諸菩薩亦誦。

庚二、明放光因緣

是故戒光從口出，有緣非無因。故光光，非青黃赤白黑，非色非心，非有非無，非因果法；是諸佛之本源，菩薩之根本，是大衆諸佛子之根本。

庚三、勸大衆習學

是故大衆諸佛子，應受持，應讀誦，善學。佛子！諦聽：若受佛戒者，國王王子、百官宰相、比丘比丘尼、十八梵天六欲天子、庶民黃門、姪男姪女、奴婢、八部鬼神金剛神、畜生乃至變化人，但解法師語，盡受得戒；皆名第一清淨者。」

※補充說明：

《梵網經菩薩戒初津》卷1：「此經從品初至第一清淨者，名為序分。從佛告諸佛子言，有十重波羅提木叉，至現在諸菩薩今誦，名正宗分。從諸佛子聽，十重四十八輕戒至偈終，名流通分。雖是六十二品中之一品，一品中之下卷，而序正流通自在全經，然就茲下卷，三分宛然。」